

30

6. febr.

8. gr.
Þóknun til eftirlitsmanns fyrir starf hans ákveður hreppsnefnd og skal hún vera ákveðinn hundraðshluti af innheimtum skatttekjum og greiðast af þeim.

9. gr.

Forstöðumaður skemmtunar ber ábyrgð á greiðslu skattgjaldsins. Ef fleiri en einn maður stendur fyrir skemmtun, ábyrgist einn fyrir alla og allir fyrir einn, eða ef um félög er að ræða, þá allir stjórnendur þess á sama hátt.

10. gr.

Skattgjald skal greiða eftirlitsmanni um leið og stimplaðir aðgöngumiðar eru afhentir. Nú afhendir eftirlitsmaður stimplaða aðgöngumiða án þess að gjaldið sé greitt, og ber hann þá ábyrgð á greiðslu þess. — Skattgjaldið má taka lögtaki.

11. gr.

Skatttekjur skulu lagðar í sjóð, og varið til að starfrækja sundlaug, heimavistar-skóla eða bókasafn. Sjóðurinn skal vera í umsjá hreppsnefndar.

12. gr.

Brot gegn reglugerð þessari varða sektum allt að 1000 — þúsund — krónum. Sé brotinu þannig háttað, að dreginn hafi verið undan skemmtanaskattur, skal sektin ákveðin sem svarar minnst fjórföldum skatti, sem undan var dreginn, þó aldrei yfir 1000 krónur. Mál, sem rísa út af reglugerð þessari, skal fara með sem almenn lögreglumál.

13. gr.

Reglugerð þessi, sem samin er af hreppsnefnd Leirár- og Melahrepps, staðfestist hér með til að öðlast þegar gildi.

Menntamálaráðuneytinu, 6. febrúar 1946.

Brynjólfur Bjarnason.

Birgir Thorlacius.

31

8. febr.

Staðfesting forsetans á skipulagsskrá „Líknarsjóðs Snæfjallahrepps“, útgefin á venjulegan hátt að mandatum af dómismálaráðherra 8. febrúar 1946. Skipulagsskráin er þannig:

SKIPULAGSSKRÁ

Líknarsjóðs Snæfjallahrepps.

1. gr.

Sjóður þessi, sem nefnist Líknarsjóður Snæfjallahrepps, er stofnaður 1. desember 1941 með 600 — sex hundruð — króna gjöf til minningar um Guðmund Jónsson frá Unaðsdal

Skipulagsskrá fyrir sjóðinn hefur ekki verið samin fyrr, og þykir gefendum og stjórn sjóðsins nauðsyn á að fá hana staðfesta. Í sjóði eru nú kr. 2539.00.

2. gr.

Tekjur sjóðsins, svo sem dánargjafir, tillög, vextir og allt það, sem sjóðnum kann að veitast, skal lagt við höfuðstólinn, þar til er hann er orðinn 4000 — fjögur þúsund — krónur.

Þegar sjóðurinn hefur náð ofangreindri upphæð, skal öllum tekjum hans og $\frac{1}{4}$ — einum fjórða — hluta vaxtanna varið til þess að styrkja efnalítið fólk í veikindum eftir þeim reglum, sem settar eru í þriðju grein.

Ef eigi skiptist upp við hina árlegu styrkveitingu, skal veita þeim mun meiri styrk á næsta ári.

Ef eigi er þá heldur sótt um styrk eða tekjurnar skiptast eigi upp samkvæmt 2. gr., skulu þær lagðar við höfuðstólinn.

3. gr.

Styrkur úr sjóðnum skal árlega veitast sjúklingum í Snæfjallahreppi í Norður-Ísafjarðarsýslu.

Skal við styrkveitingu farið eftir skýrslu hlutaðeiganda, sem stjórnin tekur gilda. Má þar tilfæra kostnað við læknishjálp, sjúkrahússvist eða hjúkrun í heimahúsum, einnig vinnutjón, ef sjúkdómurinn varir lengi og sjúklingurinn er efnalítill eða hefur fyrir mörgum að sjá og er ekki í sjúkrasamfélagi.

4. gr.

Stjórn sjóðsins skipa þrjú menn, tveir kosnir af kjósendum hreppsins, en einn af hreppsnefndinni, og skal kosið þriðja hvert ár.

5. gr.

Stjórnin skal hafa gerðabók, er í skulu færðir reikningar sjóðsins og allt annað, er hann snertir.

Minningargjafir, sem sjóðnum kunna að hlotnast, skulu auk þess skráðar í sérstaka bók, sem geymd sé á kirkjustaðnum í Unaðsdal, og skulu jafnan vera til og fyllt út minningarspjöld fyrir hverja dánargjöf.

Endurskoðun á reikningum sjóðsins skal jafnan einhver ættingi þess, sem sjóðurinn er stofnaður um, hafa á hendi, ef búsettur er í hreppnum, og sé hann kosinn árlega.

6. gr.

Sjóðinn má ávaxta í Söfnunarsjóði Íslands eða annars staðar, þar sem stjórn hans telur fulltryggilegt.

Reikningsár hans er almanaksárið.

Skulu reikningar hans endurskoðaðir leggjast fyrir hreppsnefnd Snæfjallahrepps til samþykktar ár hvert.

7. gr.

Skipulagsskrá sjóðsins má eigi breyta nema á almennum hreppsfundi, og skulu þá vera mættir $\frac{2}{3}$ — tveir þriðju — hlutar atkvæðisbærra kjósenda hreppsins og $\frac{2}{3}$ — tveir þriðju — hlutar greiddra atkvæða samþykkja breytinguna.

8. gr.

Leita skal staðfestingar forseta á skipulagsskrá þessari og hún birt í B-deild Stjórnartíðindanna.